

那文毅公奏議

那文毅公初任陝甘總督奏議卷九目錄

卷九

緝訊逆匪

稽核軍功頂戴

核實軍需平餘

蒙古行鹽

調撥哈密馬匹

議駁監糧

請緩城工

請仍驛路之舊

恭報回甘

那文毅公初任陝甘總督奏議卷九

男  
容安恭輯

緝訊逆匪

硃

嘉慶九年八月十四日會同陝西巡撫方公維甸  
奏爲趙恒裕張希賢等在漢中地方潛行勾結謀爲不

硃

軌經鄭忠祥舒洪先期出首立卽密飭速拏業將  
要犯全行弋獲地方無事訊明大概供情先行恭

摺馳

硃

奏事竊

臣

等接據寧陝鎮總兵楊芳密報並南鄭縣知

縣李師白密稟據五品頂戴鄉勇頭目鄭忠祥及

硃 硃

已撤鄉勇現充南鄭縣役之舒洪報稱有南鄭縣

苟家河民人張希賢曾拜涇陽縣民趙恒裕爲師

煽惑謀逆暗約伊等在鳳縣寧汧一帶以約人開

銅廠爲名勾結棍徒並已散鄉勇於七月二十四

日起事欲乘漢中兵備空虛入城搶劫伊等佯爲

應允設法令已撤鄉勇胡沛賺得約人書信爲據

鄭忠祥卽赴楊芳軍營呈首舒洪並副役張耀投

南鄭縣知縣李師白密稟等情臣等接閱之下不

勝駭異隨密行熟商刻下零匪卽可蕩平問閭日

就靖謐若大員率兵前往查辦不仇民心惶懼且

硃 硃

硃

硃 硃 硃

恐首犯等聞信驚颺辦理轉至費手當卽一面密飭漢中地方文武各官於南鄭鳳縣等處購線查拏一面密委糧道素納令西安府同知葉世倬馳赴趙恒裕涇陽原籍嚴查並以畧陽地方曾開銅廠該犯既藉復開銅廠約人恐在該處糾合亡命又令磚坪縣丞丁貴輿馳赴鳳縣畧陽一帶密訪臬司朱勲聞信亦卽就近馳赴漢中督同查緝茲據南鄭縣知縣李師白率同署典史朱樞並會同委署都司王卓卽赴苟家河將張希賢拏獲越日又同委員革職知縣何紹衣會同營員將鄭老么

殊

高小二馬文龍亦皆拏獲隨又前往南鄭城固交

殊

界之原公地方將趙恒裕拏獲經臬司朱勲親提

殊

各犯研鞫稟報前來緣張希賢居住南鄭縣苟家

河向不務正因與素識之王兆熊圖開銅廠獲利

上年冬底曾約該犯先後至西安商辦該犯到後

殊

找尋王兆熊不見適在黑虎巷廟內遇見涇陽縣

民趙恒裕閒談趙恒裕以扶乩可問未來之事該

犯卽令扶乩占問王兆熊相見日期屆期果與王

殊

兆熊相遇該犯遂深信不疑嗣因銅廠不能請開

另覓生計屢無就緒復向趙恒裕卜問前程趙恒

裕隨起意煽誘以該犯聚集鄉勇赴營可獲富貴之言先行試探該犯聽從次日往拜趙恒裕爲師授以符呪趙恒裕卽告以官兵均在邊界防勦漢中府城無兵又無營兵巡查各路遣散鄉勇及山內新兵人數甚多易於勾結現在太陰星落在漢江南岸二十八宿已經下凡十月內可以動手日後富貴不小卽令該犯回家假開銅版爲名糾約好漢張希賢x回籍聞知素識之鄉勇頭目鄭忠祥於四月內自提督楊遇春軍營回家該犯告以密謀鄭忠祥未卽應允假稱俟趙恒裕到來再議六

月內張希賢令鄧五兒接趙恒裕至漢中卽在鄧  
五兒家中居住並卽密約縣役舒洪爲內外應合  
之計。鄭忠祥以曾充楊遇春親隨鄉勇屢次立功  
得有五品頂戴。舒洪以曾充鄉勇旗首撤遣後又  
充縣役均不肯聽從謀逆彼此互商擬卽出首是  
月十九日張希賢復邀鄭忠祥舒洪往見趙恒裕  
其時趙恒裕托病不言令張希賢轉告鄭忠祥等  
以漢中兵少庫中存有軍器糾人混入城中放火  
爲號佔取郡城卽可戕官劫庫有人卽可起事不  
便再遲至十月又令張希賢付銀十五兩並與暗

號書信二件以爲在他處約人寄回証驗張希賢  
復約鄭老么入夥鄭老么轉令高小二赴寧沔糾  
人鄭老么又囑馬文龍招集鄉勇並未說出真情  
該犯等均向張希賢索取盤費張希賢一時無銀  
給付鄭老么等尚未糾人鄭忠祥舒洪恐其勾結  
滋事卽欲赴楊遇春軍營首告因趙恒裕所給暗  
號書信難以辨認恐首告時該犯抵賴欲設法賺  
出親筆書信以爲憑據卽在茶鎮地方令曾充鄉  
勇之胡沛送信至張希賢處謊稱鳳縣及毛坪華  
陽一帶業已招集多人索取回信張希賢信以爲

實卽令趙恒裕寫給回書有銅廠之事業已定奪  
兄台務必二十四日回府一同去之語並面告以  
七月二十四日在府城起身胡沛趕回告知鄭忠  
祥舒洪以日期已迫楊遇春遠在川省惟恐緩不  
濟事卽於七月十七日就近赴總兵楊芳軍營並  
南鄭縣衙門呈首隨將趙恒裕張希賢鄭老么高  
小二馬文龍等隔別審訊前情供認不諱臣等伏  
查漢南一帶餘氛已將淨盡該犯等探知漢中一  
帶無兵彈壓輒敢煽誘勾結謀爲不軌實屬罪大  
惡極仰賴

皇上洪福未遂奸謀業已先期敗露不數日內將要犯全  
行就獲地方靖謐無事實爲至幸茲據臬司所訊  
供詞已屬確鑿第該犯等既經起意滋事恐所勾  
結者尚不止此數人卽現獲之鄭老么等既已從

硃

逆所供未付盤費尚未糾人之語恐亦未可深信  
現已委員飭提嚴究另行定擬具奏<sub>臣</sub>等以辦理  
此案固不便輾轉株連張皇查拏然案情重大倘

硃

有供出緊要之犯亦須按名拏究以盡根株其趙  
恒裕涇陽本籍經同知葉世倬會同該縣王恭修  
親至縣北臨涇鎮該犯家內查有伊母晏氏並妻

硃

吳氏均已拏獲。詢明趙恒裕於正月外出行醫。實不知爲匪情事。詢訪鄰右均稱並無匪徒往來。該員等遂細搜查有圓光水道符咒二紙並四書本草卜卦等書十六本。別無悖逆字跡。並據鳳縣畧陽寧羌沔縣地方官及委員等查明山內居民均屬安靜。實無匪徒聚集。堪以仰慰。

硃

硃

聖懷至軍功五品頂戴鄭忠祥係提督楊遇春親隨鄉勇舒洪亦係遣撤鄉勇旗首在本縣充役。伊等因係在官管轄之人安分守法深明大義不肯聽從爲匪。且胡沛亦係曾充鄉勇三人竟能設法誘出書。

硃

殊

信據以首告尤屬能事容俟案定之日再將鄭忠祥等與緝犯出力人員另行奏請

施恩謹

奏

嘉慶九年八月二十五日奉

上諭那彥成方維甸奏鄉勇鄭忠祥舒洪首告潛行勾結謀爲不軌之趙恒裕張希賢等各要犯密行查拏全數弋獲審明大概情形一摺訊據供稱南鄭縣民人張希賢拜涇陽縣民人趙恒裕爲師煽惑謀逆暗約鄭忠祥等在鳳沔一帶以開銅廠爲名勾結棍徒並已散鄉勇

等意欲於七月二十四日入漢中府城搶劫該鄉勇鄭忠祥舒洪佯爲應允卽令鄉勇胡沛賺得書信爲據一同投首當經該督撫等密飭地方文武分投查拏將張希賢趙恒裕及夥犯鄭老么高小二馬文龍等全數拏獲所辦甚好漢南一帶餘氛久經掃蕩淨盡該犯張希賢等輒敢借圖開銅廠爲名煽誘勾結謀爲不軌實屬罪大惡極地方官一聞首報不動聲色按名查拏不致要犯漏網現在地方寧謐民情照常辦理實爲妥速所有查拏匪犯各員俱當加恩獎勵著該督撫將摺內硃批圈出之南鄭縣知縣李師白署典史朱樞委署都司

王卓查明該員等有無陞銜翎枝應如何施恩之處同革職知縣何紹衣一併據實保奏至鄉勇軍功鄭忠祥舒洪二人先經趙恒裕等告以密謀糾令入夥欲爲內外應合之計該鄉勇均不聽從遂彼此互商定爲首告之策而鄉勇胡沛於賺得該犯書信確據後一聞該犯定期起事之語隨即趕回送信一同投首地方官因得乘該犯等未經發覺之先按名弋獲該鄉勇自散撤以來平日安分守法而又深明大義不墮邪謀實堪嘉尚前日德楞泰奏到鄉勇軍功趙洪周身陷賊中能將首逆苟文潤乘間殲斃來營獻功朕心深爲嘉獎業已降

旨加恩今鄭忠祥等亦係鄉勇能如此守正急公自當  
特沛恩施俾各省鄉勇聞而鼓勵鄭忠祥著加恩以五  
品頂戴賞戴花翎卽以千總補用俟得缺後仍送部引  
見舒洪著加恩賞給八品頂戴賞戴藍翎卽以外委拔  
補其鄉勇胡沛著查明現在有無頂戴俟奏明後再行  
施恩又硃筆圈出之南鄭縣副役張耀著該地方官優  
加獎賞所有拏獲張希賢等各犯著該督撫等卽審明  
定擬一面具奏一面卽於該處正法

嘉慶九年八月二十五日軍機大臣字寄奉

上諭那彥成方維甸奏鄉勇鄭忠祥等首告趙恒裕張希

賢等勾結謀逆當將案犯全獲審辦一摺所辦甚好已  
明降諭旨矣趙恒裕等一案現據該署督等飭提嚴訊  
如有供出緊要之犯自須按名拏究亦不可多有株連  
此時餘氛將淨零匪更形渙散或思潛竄山林那彥成  
方維甸總當飭令地方文武隨時偵緝務絕根株爲要  
嘉慶九年十月十八日會同陝西巡撫方公維甸  
奏爲審明趙恒裕張希賢等謀逆一案遵

旨定擬具

奏事竊

臣

等前將拏獲勾結謀逆之趙恒裕張希賢等

訊明大概供情先行馳

奏欽奉

上諭著卽審明定擬一面具奏一面卽於該處正法欽此

臣等連日將陸續提齊各犯悉心研訊緣趙恒裕籍隸涇陽縣行謫度日並習扶乩向寓省城黑虎巷三聖宮張希賢籍隸南鄭縣素不務正因與素識之王兆熊圖開銅廠約至省城商辦嘉慶八年十一月二十一日張希賢至省找尋王兆熊不遇適遇趙恒裕閒談趙恒裕談及扶乩可問未來之事張希賢卽令扶乩占問王兆熊下落乩書十二月初三日會面至期張希賢果與王兆熊相遇遂

深信乩語靈驗嗣張希賢因銅廠久經封閉不能  
呈請開採另覓生計屢無就緒九年二月十八日  
晚張希賢復令趙恒裕扶乩卜問前程趙恒裕稔  
知張希賢曾習武應考並因山內零匪未淨起意  
誘令聚衆搶掠從中取利隨以集勇赴營可獲富  
貴之言先行試探張希賢聽從次日往拜趙恒裕  
爲師習學符咒趙恒裕卽告以官兵均在邊境防  
剿漢中府城無兵巡查各路遣散鄉勇及山內招  
募新兵人數甚多易於勾結現在太陰星落在漢  
江南岸二十八宿俱已下凡十月內漢中必有刀

兵卽可乘時動手獲大富貴囑令張希賢回家假稱開銅廠爲名糾約好漢起事張希賢聽信隨於二月二十一日起身回籍探知素好之鄉勇頭目鄭忠祥於四月內自提督楊遇春軍營回家隨往告以密謀鄭忠祥未卽應允假稱俟趙恒裕到來再議張希賢隨賃住鄧成後院空房五月初六日張希賢僱覓鄧成之子鄧五兒進省送給趙恒裕銀信接其赴漢議事鄧成父子均不知其逆謀趙恒裕於六月十五日至漢中卽與張希賢同寓次日趙恒裕進城探看歸告張希賢若有三四百人

即可混入城內搶占張希賢又密約曾充鄉勇旗  
首現充縣役之舒洪爲內應鄭忠祥舒洪暗商出  
首佯爲聽從十九日張希賢卽約鄭忠祥舒洪往  
見趙恒裕趙恒裕預留敗露推卸地步不肯與鄭  
忠祥等會面卽捏稱途中感冒風寒托病卧床令  
張希賢約鄭忠祥等至偏僻處所告以漢中兵少  
南鄭縣庫中存有軍器糾人混入城中放火爲號  
殺官劫庫卽可占取郡城乘此機會糾人起事不  
必遲至十月動手趙恒裕隨寫暗號書信二封並  
囑張希賢出銀十五兩給鄭忠祥舒洪收受囑令

糾約有人將暗號書寄回作爲驗證以便約定日期齊集鄭忠祥舒洪假意應允二十四日張希賢又約鄭老么糾人入夥鄭老么應允轉令高小二向定河一帶糾人高小二不敢聽從鄭老么囑令勿洩漏而散鄭老么撞遇馬文龍就行糾約因其酒後言語不謹謊稱官募鄉勇囑馬文龍招集擒賊受賞並未說出真情馬文龍亦卽應允鄭老么因糾人須用銀兩在黃官嶺催索識之李貴送書至府城取銀捏稱張希賢許借銀兩亦未告知逆謀情事嗣因張希賢無銀給予尚未糾人鄭忠祥

舒洪慮趙恒裕勾結成事卽欲赴楊遇春軍營首  
告因趙恒裕所給暗號書信難以辨認恐首告後  
趙恒裕等抵賴就設法賺出親筆書信以爲憑據  
卽在茶鎮地方遇見曾充鄉勇之胡沛囑其送信  
至張希賢處謊稱舒洪在鳳州及毛坪華陽一帶  
招集四五百人問取起事日期張希賢信以爲實  
趙恒裕擇定二十四日齊集府城起事寫給回書  
張希賢並囑以各帶錫鈴爲號胡沛趕回告知鄭  
忠祥等鄭忠祥因爲期已迫卽就近赴總兵楊芳  
軍營舒洪帶同副役張耀前赴南鎮縣俱各出首

經南鄭縣知縣李師白率同署典史朱樞會同護  
都司王卓並革職知縣何紹衣先後將趙恒裕等  
首夥各犯全行拏獲適臬司朱勳在興安聞信趕  
至提犯訊供並查明張希賢等家內並無收藏悖  
逆不法字跡具稟前來隨令糧道素納飭委同知  
葉世倬馳赴涇陽縣搜查趙恒裕家內止有圓光  
水遁符咒二紙並四書本草卜卦等書十六本此  
外別無悖逆字跡提犯至省隔別研訊據供前情  
不諱反復究詰實係甫經勾結卽行敗露此外別  
無糾約之人矢口不移贗之鄭忠祥舒洪等亦僉

稱張希賢之外實在無勾結之人案無遁飾查律載凡謀反及大逆但共謀者不分首從皆凌遲處死知情不首者杖一百流三千里又例載凡逆案內律應緣坐男犯十六歲以上者發往黑龍江給索倫達呼爾爲奴其緣坐婦女交值年旗酌給有力之滿洲蒙古漢軍大臣文職三品武職二品以上官員爲奴又例載容留外省流棍者照勾結引來歷不明之人例發近邊充軍各等語此案趙恒裕起意乘南山零匪未淨借以扶乩誑誘張希賢聚衆搶掠謀佔漢中府城池張希賢聽從糾約鄭

忠祥舒洪並鄭老么入夥鄭老么轉誣馬文龍糾  
人起事隨經鄭忠祥舒洪出首尚未轉糾有人其  
同謀反逆已行實屬罪大惡極趙恒裕張希賢鄭  
老么均合依謀反大逆但共謀者不分首從皆凌  
遲處死律俱凌遲處死臣等於審明後業經遵

旨恭請

王命卽行正法並傳首犯事地方梟示高小二被鄭老么  
糾約未肯聽從但既知逆情不行告首當此地方  
甫經肅清之時自應嚴加懲創若照知而不首本  
律擬以滿流尚覺情浮於法應請發往伊犁給種

地兵丁爲奴鄧五兒雖不同謀但旣留張希賢在  
家居住又受僱赴省傳送銀信迎接趙恒裕前赴  
漢中亦未便僅照勾引來厯不明之人例發近邊  
充軍應請一併發往伊犁給種地兵丁爲奴以示  
懲儆鄧成係屬家長任聽伊子招留匪徒在家並  
不禁止應照勾引來厯不明之人本例發近邊充  
軍李貴不知鄭老么等謀逆情事但妄行受僱與  
逆犯送書索取銀兩亦未便輕縱應於高小二等  
遣罪上減一等杖一百徒三年至配所折責四十  
板安置馬文龍被鄭老么誑哄奉官招募鄉勇捕

捉餘匪並不知謀逆情事惟不查明來歷妄行聽從究屬不合應請照不應重律杖八十加枷號一個月滿日折責發落鄧成次子土地保在外傭工不知伊父兄容留趙恒裕等在家應請免議王兆熊止與張希賢商開銅廠因封閉日久不能呈請開採各自走散並無不合應無庸議所有趙恒裕之母晏氏妻胡氏張希賢之妻袁氏俱應緣坐照例解京給有力之滿洲蒙古漢軍大臣文職三品武職二品以上官員爲奴起獲符咒及各書信案結銷燬至失察此案之地方文武各員卽係拏獲

案犯之人現奉

恩旨令<sub>臣</sub>等查明保奏應請免議謹

奏奉

硃批刑部核議具奏

嘉慶九年十月十八日會同陝西巡撫方公維甸  
奏爲遵

旨查明首告逆謀之鄉勇並拏獲匪犯各員分別籲懇

恩施事竊<sub>臣</sub>等欽奉

諭旨鄉勇鄭忠祥舒洪首告潛行勾結謀爲不軌之趙恒  
裕張希賢等各要犯密行查拏全數弋獲所有查拏匪

犯各員俱當加恩獎勵著該督撫將硃筆圈出之南鄭縣知縣李師白署典史朱樞署都司王卓查明該員等有無陞銜翎枝應如何施恩之處同革職知縣何紹衣一併據實保奏其鄉勇胡沛著查明現在有無頂戴俟奏明後再行施恩又硃筆圈出之南鄭縣副役張耀著該地方優加獎賞欽此仰見

皇上沛澤無遺微勞必錄之至意伏查該員弁等均無陞銜翎枝南鄭縣知縣李師白相應懇

恩以同知直隸州知州陞用先換頂戴署典史朱樞本係候補州判應請以知縣陞用原任盩厔縣知縣何

紹衣前因賊匪竄出峪口該縣扶同隱匿稟報遲  
延經<sub>臣</sub>方維甸奏請革職應請准其在陝捐復留  
陝補用護都司王卓係本營千總應請以守備拔  
補鄉勇胡沛雖未與鄭忠祥等一同出首而其賺  
取書信慎密能事且見日期已迫趕回送信其功  
與舒洪相等舒洪已蒙

恩賞給藍翎外委其胡沛一名並無頂帶應請一併

賞戴藍翎以外委拔補以示鼓勵副役張耀業交該地方

官優加獎賞謹

奏

嘉慶九年十月十八日會同陝西巡撫方公維甸  
奏爲奏

聞事竊陝省餘氛初淨邊界地方遼濶人心甫定又有趙  
恒裕陶鳳朝等案臣等督飭各屬不時留心稽查  
茲據邊境地方官稟報探聞川省達縣太平東鄉  
地方有匪徒假稱招募新兵頂補陣亡糧缺希圖  
糾約搶奪業將爲首之黃貴並聽從招人之何思  
復等十名拏獲訊出起意糾衆搶掠實情並拏獲  
羅思杰供出有夥匪欲赴陝省定遠廳地方招人  
之事等情臣等卽飛飭定遠同知嚴如煜密行查

拏去後旋據該廳於未經奉劄之先接奉德楞泰密劄飭查當經查明該廳城內吏役兵丁以及民人商賈爲數無多易於稽查徧加訪緝竟無影響等語臣等查漢中一帶兵燹之後人心易搖而無業之徒習於游蕩更易勾結定遠與太平緊相毘連是該犯等輾轉赴陝招人亦屬事所必有該廳所屬境內均係大山深林各路寨堡及散處民人甚多不可以爲城內居民現查無聽糾之人即可放心且西鄉一縣亦距川較近恐亦難保無轉相糾約之事除嚴飭該廳縣文武各員一體訪糾外

查新調漢中府知府朱紱業已赴任該守久在軍營并於邊境情形亦屬熟悉臣等飛飭該守馳赴定遠西鄉一帶督率該廳縣等不動聲色密行查拏一面飛致德楞泰如續經訊出在陝勾結之人卽將該犯姓名密行札知以便按名查拏如有緝獲卽就近解赴川省歸案質訊辦理此等匪徒於岑匪肅清之後尚敢借端糾人搶奪必須從嚴懲辦卽使被誘之人未必皆知該犯等起意實情而轉相糾約之犯必係同謀不法斷難姑容惟當於嚴密之中持以鎮靜祇將要犯緝獲毋使株連臣

等因事關緊要是以由驛奏

聞謹

奏奉

硃批嚴密查緝鎮靜辦理有犯必重懲未犯莫騷擾勉之  
嘉慶九年九月二十五日會同陝西巡撫方公維  
甸

奏爲查出興安匪徒惑衆斂錢一案獲犯研訊民情靖  
謐情形事竊<sub>臣</sub>等接據興安道府來稟安康縣所  
屬牛蹄鋪一帶有匪徒陶鳳朝等惑衆斂錢轉相  
煽誘受騙出錢之人甚多臬司朱勲在宜陝得信

後卽馳赴興安查辦適該道府等督率該縣已將  
要犯陶鳳朝陳有信等拏獲經該司逐加審訊緣  
陶鳳朝於本年二月間約同陳有信楊宏道汪天  
臣龍勝輝李勝白燕庭彩等指稱僱募民夫運送  
兵勇骨殖編造千領百領十領名號陶鳳朝自認  
爲千領令陳有信等認當五百領及百領十領頭  
人轉約平利縣民李九瀝告以每付骨殖可領運  
脚銀七十二兩若充當夫頭一名共領運骨殖五  
包可領運脚銀三百六十兩運送之後並賞頂戴  
榮身先令出銀謀充此役李九瀝信以爲實陸續

給過銀五十四兩該犯等得銀之後捏造批詞告  
以業經奉批不准認充李九澹卽向索討原銀陶  
鳳朝等無銀給還致相爭鬧李九澹卽赴縣控告  
隨將陶鳳朝陳有信楊宏道龍勝輝燕庭彩等先  
後拏獲並究出轉相糾約及被騙出錢之李文龍  
楊耀庭傅榮胡太吳志高温宗乾鄭洪才彭朝綱  
等一併拏獲到案其未獲之犯現在密行查拏等  
情稟報前來臣等竊查軍興以來軍營糧臺僱用  
人夫爲數不少從無千領百領等項名目該犯等  
指僱夫運送骨殖爲名何以私立名號且各營傷

亡兵丁俱係隨時送回原營並無存積該處事屬荒唐何以衆人均受其惑即使一二人被其愚弄何至有轉相糾約之人况愚民嗜利焉有先令出資而後令領價輒相聽從之理其中情節種種可疑旋又據各處文武稟報情節各有不同恐不免有藉詞糾衆不法情事臣等伏思此案人數過多且立有千領百領名目詐財聚衆案關重大自應不動聲息嚴密飭拏要犯務使徹底查明妥速完結方爲全善臣等又恐趙恒裕等謀逆一案在事人員甫奉

恩旨優獎或人人存邀功冀賞之心致累無辜於事大有關係現飭該司持以鎮靜訊明實在供情祇將案內緊要人犯逐名拏獲嚴行審訊分別辦理若實係被騙之人概免查究以杜株連滋擾之弊謹

奏

嘉慶九年九月二十九日軍機大臣字寄奉

上諭那彥成方維甸奏拏訊安康縣所屬牛蹄舖一帶匪徒陶鳳朝等指僱夫爲名惑衆斂錢一案現據各處文武稟報情節各有不同恐不免有藉詞糾衆不法情事又恐人人存邀功冀賞之心致累無辜等語此案陶鳳

朝等指稱僱募民夫運送兵勇骨殖私立千領百領等名號並以充當夫頭者於運送後可得頂戴榮身之語轉向糾約誘騙令先出銀謀充曾陸續得受李九瀝李文龍等銀錢是該犯之意祇在詐財似尚無聚衆不法情事地方官一經查出卽將要犯等立拏到案現經臬司朱勲馳往該處將惑衆斂錢一節訊有確供自非架空虛捏希冀邀功但既據各處文武稟報情節各有不同自應徹底根究以成信讞著那彥成等轉飭該臬司詳加研鞫如陶鳳朝等實係藉名糾衆斂錢並無別有不法之處祇應將得受銀錢之犯按律定擬具奏就案

完結其出錢各犯皆係無知被騙之人情尚可原自應一概省釋以免擾累

嘉慶九年十一月十六日會同陝西巡撫方公維  
何

奏爲審明匪徒陶鳳朝等假捏招夫誑騙銀錢一案分  
別定擬具

奏事前據興安地方官拏獲陶鳳朝等犯先將臬司審  
訊大概供情奏蒙

聖鑒在案茲檄提案犯並原告李九滙來省先委藩司慶  
章糧道素納逐加質訊與臬司朱勲所審情節相

同臣等復親提研鞫緣嘉慶九年正月內陝楚四  
川邊界地方傳言大功告成即日撤兵節年陣亡  
兵丁骨殖皆須僱募長夫背送每名可領腳價數  
十兩愚民希獲厚利轉相傳播有安康縣客民陶  
鳳朝因聞同縣客民李勝白言及此事亦愿充夫  
二月內囑令龍勝輝赴平利探聽旋經龍勝輝探  
明係屬訛言實無其事三月內陶鳳朝以各處皆  
有僱夫謠言易於哄誘起意藉此騙錢告知李勝  
白龍勝輝並素識之燕廷彩陳有信劉金魁俱各  
應允陶鳳朝當與伊義父楊洪道商定誑騙之計

捏稱泰山廟內曾寄放陣亡兵丁骨殖將來各路  
軍營尚有二千餘副骨殖俱由興安僱夫轉送索  
倫並雲貴地方每送一副僱夫一名給腳價銀七  
十二兩於腳價內先給領安家銀三十兩包夫五  
名者爲夫頭包夫十名者爲十領夫頭如充當十  
領夫頭即可領銀七百二十兩由此百領二百領  
五百領千領夫頭按數遞加領銀甚多仍賞頂戴  
受僱之人皆須向千領夫頭報名先給定銀方准  
當戈陶鳳朝假充千領夫頭令李勝白龍勝輝燕  
廷彩陳有信劉金魁假充五百領百領十領夫頭

分投約人給銀報名楊洪道又到處揚言曾經見過諭帖陶鳳朝實係千領夫頭領辦僱夫之事使人聽信不疑陶鳳朝隨赴劉家墳地方租住張安飯店後間房誑騙鄉民楊洪道時往商議陶鳳朝與李勝白龍勝輝燕廷彩陳有信劉金魁先後騙過三十八人而陶鳳朝所騙之吳志高李文龍亦轉約二人陳有信所騙之汪天臣亦轉約七人汪天臣轉約之何文龍楊耀廷李勝美又轉約十二人楊耀廷轉約之胡顯名傅榮又轉約八人李勝美轉約之張傳富又轉約一人各處報充銀錢多

寡不等陶鳳朝分別許以五百領百領十領等項  
夫頭名曰並充當散夫除首從同謀七犯外共騙  
過六十八人得銀三百四十九兩零陶鳳朝自用  
銀二百六十七兩零龍勝輝分用銀二十兩燕廷  
彩分用銀二十五兩陳有信分用銀十五兩劉金  
魁分用銀二兩八錢楊洪道分用銀二十兩李勝  
白恐事敗露心存畏懼並未分銀其輾轉約人各  
犯均不知假捏情節亦未得過銀兩嗣因被騙之  
人催問何時領銀起程陶鳳朝捏稱省中解到銀  
兩方可支領七月初七日有陳有信所招之李九

隆復往查問遂捏造額勒登保批語一帛給付楊  
洪道亦在旁酌改數字大意言定有運送骨殖之  
事將來聽候傳喚李九隆本不識字持批央人閱  
看識出假捏情弊向陶鳳朝索討原銀未給李九  
隆遂赴縣控告獲犯審悉前情實係詐騙銀錢並  
無聚衆不法情事臣等以川省黃貴等假名招兵  
一案先係趙思煥以招夫背送骨殖爲名其後始  
改捏招兵今陶鳳朝假捏之語與趙思煥相同川  
省旣訊出聚衆謀搶情節恐該犯等亦與川省匪  
徒勾通意在搶掠隨向陶鳳朝詰訊據供僱夫背

送骨殖的話不是小的首先編造原是竹谿平利  
安康西鄉南鄭定遠各處地方傳說無人不知小  
的不過指此名色騙錢使用並非要糾衆搶掠四  
川與湖北陝西連界想來這謠言傳到四川那裏  
的人也借招夫名色邀人鬧事並非小的勾串至  
趙思煥黃貴二人小的都不認識等語稟據臬司  
朱勲面稟本年二月內平利地方有竹谿背夫傳  
播招夫謠言曾經該縣石珩查拏柳責核其月日  
尚在陶鳳朝假名招夫之前可見三省邊界原皆  
有此等訛傳是以川陝匪徒不謀同辭胥借此言

感衆其非串通一氣似屬可信但陶鳳朝等假捏招夫如果僅爲騙錢何以捏造千領夫頭五百領夫頭等項名目恐係部署黨與另有不軌情事復將各犯隔別嚴訊據供千領五百領等名本是守備王英所帶鄉勇的名目王英向在安康平利防勦衆人都知道這些名色如今小的們假捏招夫原是騙報名的使費若只招些散夫得銀有限必須捏造總領腳價的夫頭哄人貪利報充纔能多騙銀錢因此照鄉勇舊有的名色捏造千領五百領等項夫頭叫人多出使費並不是真派這些頭

目希圖滋事

臣

等復詰以誑騙銀錢祇能掩飾一

時豈不慮及日後敗露控告索討自係借名聚衆  
欲俟招集人多再行脅同搶掠據供衆人已經受  
騙斷不肯甘心聽從小的們同謀知情的只有五  
六人豈能逼脅多人鬧事況且零星招人報名從  
沒有約過日子在某處會齊那裏有聚衆的事小  
的們俱是無業的人原想多騙些銀錢逃走脫身  
沒有別的圖謀不料李九澂看破控告不及脫逃  
就被拏獲各等語體察各犯供詞祇認騙錢尚恐  
有串通狡展圖避重罪情事因思此案係李九澂

告出各犯設有他謀李九澧必不爲之隱諱隨提  
李九澧訊問諭以爾係首告破案之人陶鳳朝等  
是否另有糾衆滋事情節爾能說出實情各犯皆  
治重罪既可洩爾被騙之忿又可照漢中鄭忠祥  
等首告逆匪之例仰邀

恩獎當據李九澧供稱前被陶鳳朝等騙去銀兩忿恨控  
告如果伊等有不法情事據實告出正可洩忿邀  
功豈肯代爲隱瞞但伊等實祇騙錢並無別故亦  
不敢憑空誣賴反復開導矢口不移臣等詳核案  
情疊經研訊均與原審無異惟地方官初稟此案

時係陶鳳朝爲首而總兵王兆夢又報稱係傅榮爲首並稱所招人夫曾給予安家銀兩情節稍有不符臣等前次

奏後卽行剴查該鎮茲據王兆夢查覆傅榮係散子坪客民聽從楊耀廷招充夫頭給過陶鳳朝報名銀兩自又在散子坪轉邀傅貴等七名充當散夫委係被騙並非首犯散子坪鄉約祇知傅榮在該處招過人夫因卽稟報該鎮以傅榮爲首又因傅榮誤信陶鳳朝先領安家銀兩謊言轉向所招人夫告知該鄉約不知詳悉遂稱曾給予安家銀兩該

鎮據情轉報故與興安地方官所稟不符今已查  
明通案首犯實係陶鳳朝並非傅榮所招人夫亦  
未得過安家銀兩質訊各犯僉供如一案無遁飾  
查律載用計詐欺官私以取財物者並計贓准竊  
盜論免刺若冒認及誑賺局騙拐帶人財物者亦  
計贓准竊盜免刺又竊盜贓一百二十兩以上絞  
監候又名例載律稱准者罪止杖一百流三千里  
又例載詐爲察院及其餘衙門文書誑騙財物者  
發近邊充軍各等語此案陶鳳朝指稱招夫事後  
銀錢共得贓銀二百六十七兩事後捏造偽批搪

塞與詐爲印信文書誑騙不同自應仍照誑騙本  
律准竊盜論罪止杖一百流三千里惟該犯設計  
詐財捏造千傾五百傾夫頭等名目誑騙多人並  
稱充當夫頭可得頂戴尤屬誕妄未便仍留內地  
應請改發伊犁等處給兵丁爲奴楊洪道同謀商  
騙散布謠言又爲陶鳳朝斟酌僞批塘混厥罪維  
均應請一併發往伊犁等處給兵丁爲奴以示懲  
儆其聽從糾約騙錢分用之龍勝輝燕廷彩陳有  
信並聽從糾約誑騙未經分銀之李勝白俱照爲  
從減一等各杖一百徒三年至配所折責四十板

安置吳志高李文龍汪天臣楊耀廷李勝美胡顯  
名傅榮張傳富八犯係被陶鳳朝哄騙不知假捏  
情事惟該犯等輾轉招夫皆非安分之徒張安容  
留陶鳳朝在店雖未知情分贓亦屬不合均應照  
不應重律杖八十各折責三十板其餘被騙出錢  
之人均免置議已到案者概行省釋未到案者免  
其查究逸犯劉金魁何文龍飭緝獲日另結陶鳳  
朝等所得銀錢照追給主謹

奏奉

硃批刑部核議具奏

稽核軍功頂戴

謹按嘉慶九年八月二十五日廷寄內奉

上諭前據德楞泰奏藍翎五品軍功趙洪周將荷文潤殲  
斃獻功而此次趙恒裕等又係軍功鄉勇鄭忠祥等首  
告拏獲可見鄉勇中頗有奮勉出力之人自當優予恩  
施俾知感奮但朕聞軍營各路鄉勇所給軍功頂戴自  
四五品至七八品不等並不奏明咨部多係帶兵大員  
隨時獎賞給以委牌卽督撫以至司道亦有一體賞給  
者頂戴乃國家名器非臣下所應擅予軍營帶兵大員  
果因鼓勵人材何難奏明請旨卽加以超擢總應秉自

上裁設人數稍多亦當彙奏咨部查核似此私行賞給  
難保無冒濫情弊而該軍功等撤回原籍後特符滋事  
亦所不免現在軍功已將全竣所有此次凱撤鄉勇業  
經議定章程無庸置議外究竟軍功名目起自何年何  
處軍營係何人首先賞給之處已諭令兵部確查案據  
外著那彥成方維何就近查詢並詳檢歷年軍營檔冊  
有無奏咨成案奏聞辦理

嘉慶九年十月二十六日會同陝西巡撫方公維  
何

奏爲遵

旨查明恭摺覆奏事竊臣等欽奉

諭旨軍功名目起自何年何處軍營係何人首先賞給之處已諭令兵部確查案據外著那彥成方維甸就近查詢詳檢歷年軍營檔冊有無奏咨成案奏聞辦理欽此

臣等查從前出師征討外夷皆係兵丁原無鄉勇卽內地勦捕亂民如王倫蘇四十三張文慶等案爲日無多其時隨征兵丁內有偶著勞績酌加獎勵者不能遽邀擢拔卽由帶兵大將軍賞給頂戴有行營千總把總外委之名因此等獎賞虛頂皆係軍功所得亦爲軍功千總把總而綠營俗稱卽

徑謂之軍功兩字名曰實沿於此迨至臺灣勦賊時征兵之外始有義民大半係自備口糧保護鄉里幫同守城勦賊帶兵大員及道府等始有賞給軍功頂戴之事將軍常青曾奏過三百四十餘名福康安接辦軍務亦賞給義民首五六品至七八品頂戴事竣時經福康安通查請補文員二十五名武弁九十二名頂戴榮身者一百九十三名開摺具奏是兵丁之軍功頂戴山來已久而鄉勇之軍功頂戴實始自臺灣此次陝甘川楚河南等省勦捕教匪鄉勇之得有軍功頂戴者人數猶衆其

中偶有

奏賞者其餘多係酌量賞給並未奏咨

臣

等詳檢陝省

冊檔前撫

臣

秦承恩於嘉慶元年三月內具奏與

安各屬剿殺賊匪單內有平利縣鄉勇首劉鳳周  
等得有七品頂戴之語此係陝省奏明軍功頂戴  
之始至帶兵大臣及督撫司道等官隨時獎賞未  
經具奏者皆由軍營自行給照並不互相咨會無  
案可稽實不能確指起自何人何處查教匪滋事  
起於湖北彼時湖北用兵或者帶兵大員卽有賞  
給頂戴之事亦未可定再次得有頂戴鄉勇嘉

慶八年正月經軍機大臣會同兵部議覆額勒登保條奏善後事宜案內議准奉

旨賞給頂戴之軍功情愿入伍者准照所得頂戴酌量拔補未經

奏明由各帶兵大員司道賞給執照頂戴者均令查明由督撫換給執照彙齊造冊咨部存案十一月內復經大學士九卿議覆勒保清查軍功頂戴案內  
欽奉

諭旨飭令地方官廣爲曉諭鄉勇等自行呈驗執照註明年貌籍貫三代勒限報部以杜假冒一載以來陝

省因餘氛未靖民多結寨而居呈驗執照者無多  
尚未一律換照依限核咨現在勦捕零匪事竣

臣

等復飭屬通行曉諭令卽呈驗執照註明造冊惟  
是時閱九載人數衆多現存者多有出外貿易在  
家者患病之人一時不能到齊已故者又恐有賣  
照頂冒情弊尤須詳加稽核應請展限一年遵照  
奏定章程詳查彙咨以副

皇上慎重名器嚴杜冒濫至意謹

奏奉

硃批依議妥辦咨部知道有功者不可泯沒無功者勿令

冒認

核實軍需平餘

嘉慶九年九月二十五日會同陝西巡撫方公維  
甸

奏爲遵

旨詳查據實覆奏事竊

臣等欽奉

諭旨吳熊光等奏查湖北濫用平餘一摺分晰開單進呈  
因思川陝楚三省皆經動撥軍需今湖北查有濫用平  
餘川陝二省亦必不免著將吳熊光等原摺抄寄閱看  
勒保方維甸當照此辦理查明節年濫用銀數共有若  
干將應追各員名銀數及實係領兵官員用過犒賞分

別開單奏明候朕核辦該督撫務須徹底清查秉公詳核不可因見此次朕將領兵各員賞犒銀兩免其著追卽將別項濫用一併混列領兵各員賞項之下希圖豁免倘有朦開將來別經查出惟該督撫是問川陝二省現俱辦理報銷如果有例不合銷委因迫於時地並非侵肥入已者准其據實奏聞朕當酌量辦理倘有意蔽混虛捏灑銷該督撫不能當此咎戾也將此傳諭勒保方維甸並諭那彥成知之欽此當經<sub>臣</sub>等恭錄飭行藩司慶章會局詳查茲據該司慶章等查明嘉慶三年以前扣存平餘無多並將應賠濫用銀數核明

詳請具

奏前來伏查軍興以來各省皆有濫用銀兩楚省所用  
係屬軍需平餘陝省所用卽是軍需正項緣楚省  
支發軍需本有扣存二分四分八分平餘陝省各  
局向來未存此項卽採買車腳等款例扣之一分  
平餘亦多未照例扣存檢查三年以前冊檔發過  
軍需銀九百八十八萬四千五百一十兩零又知  
州周安邵捐復之項歸入興安軍需支發銀六千  
四百兩共計實發銀九百八十九萬九百一十兩  
零內祇軍火軍裝數款計銀一十一萬二千三百

餘兩曾扣過一分平餘銀一千一百二十三兩零  
除支發盤費藥料之外僅存銀六十二兩零是以  
例外濫用因平餘無多皆於正項內動支所有三  
年以前濫用銀數陝省查出較楚省猶多臣方維  
甸於上年到陝時曾同原任侍郎額勒布初彭齡  
查辦軍需共查出浮支濫應銀六十五萬三千四  
百一十餘兩業經額勒布等

奏明分別追賠其未核浮支之銷冊及未開濫應糧員  
臣方維甸復督率軍需局司道續查出銀五十二  
萬二千四十五兩六錢現已另摺開單具

奏共計兩次查出浮支濫應銀一百一十七萬五千四百五十餘兩內除糧臺州縣等官應賠浮支數外凡宜興秦承恩溫承惠等軍營濫應之項均於本員名下着追如係領兵大員濫應銀兩仍令隨營糧員賠交毋庸豁免所查應賠銀數浮支者以刪減銷冊爲據濫應者以自行開報原文爲據不敢牽混狗隱移開如有軍營實用例不准銷之款再當遵

旨奏請

聖訓亦斷不敢虛捏灑銷代人受過再軍需內採買車腳

等款原有例扣之一分平餘陝省多未扣存此時  
辦理報銷仍將例扣款項核出應存平餘以杜牽  
混惟從前司庫撥發興安總局漢中等處糧臺銀  
兩及各局各臺轉發各員之項是否實係足平事  
隔多載亦須徹底根查前任藩司局員多已陞調  
現任陝省者尚有臬司朱勲潼商道吳沂道銜直  
隸州知州陳祁知府周光裕並曾經領銀之員容  
再逐一詢明核實奏

聞至甘肅用過軍需銀兩是否扣收平餘作何支用容  
臣  
那彥成回蘭後督率軍需局各員詳細查核實數

另行具奏謹

奏奉

硃批秉公查辦不可牽混

蒙古行鹽

嘉慶九年八月初六日

奏爲欽奉

諭旨先行恭摺覆

奏事竊

臣

於本年七月二十六日欽奉

上諭前因阿拉善口鹽偷越行銷漸至楚省地界有礙准  
引節經諭令山西巡撫設法查禁而口鹽侵越之弊仍  
未能絕昨張師誠來京陛見時曾面諭回任後將晉省  
所食口鹽販運情形查訪具奏茲據奏稱水運口鹽在  
晉省祇有黃河一道別無歧路現在查明磧口鎮所到

蒙古鹽船較前大爲減少委無越界多販情弊惟訪聞  
阿拉善另有鹽海地方在阿拉善之南界與甘肅接壤  
雖非蒙古自行運售而甘肅民人常往挑取輾轉接販  
可由漢中直下等語是甘省民人販運蒙古鹽觔以致  
偷越湖北侵灌淮綱顯有路徑可通不可不嚴行查禁  
所有阿拉善地方與甘省毗連處所應如何嚴立章程  
設法防範毋任偷漏販運之處著那彥成率同蔡廷衡  
悉心籌議具奏伯麟等原摺著抄寄閱看欽此仰見

聖主惠民通商澄清流弊之至意伏查阿拉善口鹽運供  
晉省太原等處民食其船隻必由臨縣之磧口鎮

經過該處上下游皆與陝省葭州吳堡宜川三  
邑地方對岸從前原不免有越境偷漏之弊自上  
年撫臣伯麟欽奉

諭旨嚴立章程酌定每船裝鹽數目以東岸磧口鎮爲泊

船總滙不許於上下游之天橋孟門鎮龍王辿等

處任意停留撫臣方維甸復於西岸陝省葭州屬

之萬戶峪吳堡屬之橫溝村宜川屬之西龍王辿

分設卡隘嚴密稽查按月稟報是晉省旣清其私

販之源而陝省復杜其偷越之路臣詢之方維甸

並原委承辦之道員楊馥俱稱實力奉行防範頗

爲周密今伯麟等摺內聲敘情節奸販等由甘省  
鞏秦一帶入陝省隴州分途入楚來踪去跡歷歷  
如畫其說自非無因必當徹底嚴查卽爲設法禁  
絕臣現已密飭藩司蔡廷衡遴委妥員速赴阿拉  
善之南體察鹽海出產之處籌畫防範章程務期  
杜絕奸民牟利之源而又不可稍有紛擾其鞏秦  
等處私販出入必經亦當設卡巡防遏其去路查  
道員楊護原委查辦陝省私越偷漏之事現因迴  
避赴甘尚在西安辦理交代臣已當面委令馳赴  
鞏秦一帶不露聲色嚴密查報又陝省白河一縣

硃

爲入楚要途其西鄉一縣亦另有由川入楚之徑  
臣因臬司朱勲現在漢南已飭其就近妥爲查辦  
至伯麟等摺內敘述知府廣玉等所言可見積弊  
流傳爲時已久何以向來任聽奸販等來往自由  
地方官毫無覺察恐不免有得受陋規明知故縱  
情事此時清理固不必過事張皇亦必當嚴爲禁  
革統俟該司道等徹底清查稟復到日臣再與蔡  
廷衡悉心熟籌另行奏請

訓示謹

奏奉

硃批知道了

謹按嘉慶九年十二月二十七日廷寄內奉

上諭那彥成另摺奏阿拉善鹽務情形一摺已有旨諭知  
方維甸蔡廷衡矣

調撥哈密馬匹

嘉慶九年九月十六日

奏爲調撥哈密供差馬匹恭摺奏

聞事竊查哈密每年應需供差馬三百匹向在巴里坤牧

廠馬匹內撥給茲查原任督

臣

惠齡案准哈密大

臣來咨該處撥用嘉慶七年供差馬匹截至嘉慶

九年二月止實存馬四十六匹不敷供差請將巴

里坤扣留嘉慶九年備撥馬三百匹照數撥解以

資應用等情

臣

接任後詳加查核哈密供差

馬匹自嘉慶七年撥解馬三百匹之後截至嘉慶

九年二月尚存馬四十六匹則嘉慶八年應撥馬三百匹自可毋須重撥臣現在飛飭巴里坤總兵撥馬三百匹作爲嘉慶九年分例撥馬匹卽令選派兵役迅速解往哈密交收以資供差其巴里坤廠所存應撥哈密嘉慶八年分差馬三百匹旣已無須解往自應設法疏通以免在廠擁擠查肅州甘州永固涼州西寧等提鎮營嘉慶十年春夏二季均有應行領價買補馬匹且該處均有馬廠可以留牧且距肅州較近不致長途疲乏應將前項馬三百匹留爲肅州等營十年分春夏二季合例

倒馬補缺之用庶馬廠不致有擁擠之患而各營亦可省買補之煩於

帑項亦爲節省再查巴里坤存馬除分撥外尚有出羣騾馬九百三十二匹足備嘉慶十年分撥給哈密供差並各營季額倒馬之用謹

奏奉

硃批所辦是知道了

議駁監糧

嘉慶九年十月十六日會同陝西巡撫方公維甸  
奏爲酌籌陝省捐納監糧詳查例案體訪市價先將實  
在情形縷晰奏陳恭請

聖訓事竊照前任督

臣

惠齡撫

臣

祖之望會奏善後事宜

摺內奏稱陝省額貯倉糧自軍興以來動支甚多  
存貯無幾不特急應補足原額並須分別加貯請  
暫開納粟作監之例收糧實倉等因經軍機大臣  
會同戶部議奏以其事尚屬可行惟每名應捐穀  
數是否悉照乾隆三十九年舊案辦理抑或今昔

情形不同量爲增減且概收本色或致市價增昂  
該省現在捐監原爲補足封貯銀兩今又請捐粟  
實倉其封貯銀兩作何籌辦未據聲明行令將如  
何酌量變通之處妥議章程聲明具奏在案伏思  
陝西倉貯空虛自應亟籌備貯若通省採買穀石  
糧價運腳需用繁多且按照部價每石僅發六錢  
實屬不敷市價派買擾累勢所必然今議請暫開  
監糧誠爲籌補倉儲良方臣等檢查舊案陝省收  
捐監糧始於乾隆三年至乾隆九年前撫臣陳宏  
謀定立章程最爲周妥其時常平倉穀並未動支

缺額係將捐監穀石作爲額外儲蓄共應收捐穀  
一百六十五萬餘石二十二年又經陳宏謀奏請  
定邊等七州縣再收穀三十五萬石二十九年  
前撫臣明德奏准添設府倉令各府收捐穀三十四  
萬石於三十一年七月奉

旨撥發部帑三百萬兩爲甘省買補倉糧之用因將陝甘  
監糧停止所有節次議定各府州收捐穀數目均  
隨時按照各處糧價合之捐監例交銀數以爲差  
等是以乾隆三年定例各府州俊秀每名捐穀自  
一百二十九石至二百二十五石不等九年因糧

價漸貴陳宏謀奏減穀數自八十石七斗五升至一百八十三石六斗不等二十二年二十四年三十年歷任撫臣將西安延安鳳翔同州各府乾州綏德兩州捐穀分別遞減彼時皆實係收捐本色糧價增昂則穀數奏減故能收捐無弊倉貯充盈迨至乾隆三十九年前撫臣畢沅因甘省收捐監糧亦請復開陝省捐監事例原奏摺內卽以歲告屢豐穀賤傷農爲辭一時希冀准行辦理遂不無虛飾是年所定捐穀數目原未合算時價不但不足照節年所減之數且較乾隆九年穀數轉有加增

卽以西安一府而論乾隆九年原定每名捐穀一百一十四石七斗五升三十年已減至八十六石乃三十九年復開監糧時又增爲一百二十石相去三十載穀價豈能轉賤推原其故不過以收捐本色爲名其實多收折色又以所收折色銀兩按照部價派買民間徒然苦累農民倉貯仍難補足茲旣爲籌補倉儲起見議開監糧自應切實辦理杜絕向來弊端概收本色惟是近年陝省糧價倍昂更非乾隆三十年以前可比各府州所報糧價尚係將各屬牽算較實在市價減少已與從前糧

價不侔卽如漢中興安商州等府州從前米糧極賤今則加至數倍爲通省最貴之區今昔情形實已迥異查陝省捐監正項連照費部飯等項共收銀一百三兩五錢若將此數計算中等市價僅合穀五六十石不等比對舊案穀數或減一半或減三分之二爲數未免太少部議亦斷難准行若意存遷就仍照舊例穀數收捐合之目前糧價較藩庫交納折色銀兩多至倍蓰竊恐納粟無人捐例徒爲虛設總須各屬捐穀之價與藩庫捐銀之數相等按數核明無從避多趨少使有糧者就地納

粟有銀者來省捐銀所費皆同任從民便方於歸還封貯補足倉儲兩事各無妨礙臣等仰荷

聖主厚恩事事惟期核實如果所定章程實在可行方敢奏請辦理若穀數難以減少收捐不能踴躍於倉貯無甚裨益莫若將納粟作監之例仍請停止臣等通盤籌畫欲補陝省倉儲舍此別無他法卽收捐數目較舊案未免減少未敢率行定議理合據實縷晰奏

聞謹

奏

嘉慶九年十二月初七日奉

上諭那彥成方維甸奏酌籌陝省捐納監糧情形一摺前因陝省額貯倉糧自軍興以來動支甚多亟應補足存貯該督撫等奏請暫開納粟作監之例收糧實倉經部議令妥酌章程具奏今據那彥成等奏稱近年陝省糧價倍昂若查照舊例穀數收捐合之滿庫交納折色銀兩多至倍蓰恐捐生不能踴躍等語自係實在情形著照所請將納粟作監之例暫且毋庸辦理但倉儲關係緊要仍著方維甸就近體察市價情形一遇歲豐穀賤之時再酌量情形奏明辦理那彥成等摺併發

請緩城工

嘉慶九年十月十六日

奏爲籌議固原等處城垣工程暫緩興修以裕經費事  
案查前奉部咨令將嘉慶八年咨報文內聲明固  
原平涼臯蘭岷州四處城垣因雨水衝損並坍塌  
過甚急應修理又涇州城垣被水衝損均應作速  
確勘估計造具冊結奏報辦理等因遵查固原平  
涼臯蘭岷州涇州等五處並上年續報隴西秦安  
階州鹽茶禮縣靜寧六處均因秋雨過多城垣被  
水衝損又本年春間漳縣具報該處城垣因歷年

久遠坍塌過甚詳請急爲修理共計各該州縣城垣一十二處工程均關緊要自應遵奉部示奏請諭旨一律估勘興修以資捍衛但查司庫經費現在不敷又無別款借墊前項工程需費浩繁約畧估計總需銀一百餘萬兩之多當經飭令藩司蔡廷衡復行委員逐細確勘茲據詳報各該處城垣雖不壯於觀瞻尚無妨於攸閉應請暫緩修理統俟經費充裕再行次第估計奏請辦理等情前來伏思各該州縣城垣既屬無妨攸閉現在庫項不能敷餘自應暫爲稍緩俟經費充足再行估辦仍飭各該

州縣先就坍塌過甚擇其緊要處所酌爲粘補以資保障庶要工可以稍紓而經費不致竭蹶謹

奏奉

硃批所見甚是知道了

請仍驛路之舊

嘉慶九年十二月初五日

奏爲察訪甘省驛路情形無須遷改請仍其舊以免更

張事竊

臣

初抵西安博採輿論將兩省因革事宜

留心察訪僉以甘省改設驛路一事多有未便竊以驛站係臬司專政當經飭委甘肅按察司崇祿親往新路查勘實在情形去後旋據稟稱新路地勢較之舊路本屬平坦惟靖遠境內黃河阻隔每至夏秋水漲發灘險浪急過渡維艱不若蘭州浮橋行走便捷且此路係避山而行地勢窪下每

至大雨時行積水難涸亦多阻滯前督

臣

惠齡委

員履勘時適值冬日道路乾燥未及詳察今復細  
詢居民實爲沮洳之地其自靖遠至鹽茶固原一  
帶地方遼濶數千里內絕少人烟凡解送餉鞘及  
遣發犯人雖添設營汛墩臺撥差護送而地僻人  
稀亦恐不免疎虞之慮似應毋庸改設等情並會  
同藩司具詳前來臣復於沿途詳詢耆民並遇新  
疆來往人員逐加訪問亦皆不以新路爲便竊查  
舊路州縣城池以及墩臺營汛甚爲聯絡百餘年  
來一切差使從無貽悞今所稱不便行走之處惟

會寧縣屬之七十二道腳不乾溝及安定縣屬安定橋被水衝斷茲臣經過該處留心察看查七十二道腳不乾溝之南另由山上取道行走遠近與溝內相等而土山開路亦不費力其安定舊橋雖衝若另行築基重建所費亦不過五六千金此二處一經修理卽無阻滯之虞雖新路驛站安設之後經費漸有節省而現在卽需動項五萬餘兩加以公館橋梁等項地方官自行捐修亦需銀四五萬兩甘省地方瘠苦恐又敢不肖之員藉此虧缺之端臣愚昧之見更立新制不若遵循舊章既可

於舊路稍爲修葺卽成安途似毋庸過事更張致  
多繁費

臣

耳目意計所及不敢不據實

上陳謹

奏奉

硃批旣不便行旅竟毋庸辦理爲是

恭報回甘

嘉慶九年九月二十五日

奏

臣那彥成抵陝以來與撫

臣方維甸悉心籌酌善後

事宜現在鄉勇均已安插似可無事至陝省各營新兵得蒙

聖恩賞借馬乾置地均可衣食豐足無不人人歡忻安分守法再加教練可成有用之兵惟散遣各營夫役閒穢人等現在按定章程不日亦可辦竣是善後要事無過此數端今已定有規模臣擬於拜摺後即可回蘭州任所將地方事件並年終稿案趕緊

料理以後陝省善後尚有應辦各事臣仍與方維甸隨時札商妥議籌辦統俟明歲春間寧陝地畝置買齊全業經耕種臣再行來陝周歷南山及漢南一帶親爲查勘謹

奏奉

硃批知道了

那文毅公初任陝甘總督奏議卷九